

## Botteltjie groen

Ou swerwer wat die langpad ken  
Wat die drumpel nooit kon vind nie  
Jou kroon geklee met nuwemaan  
Met geen winter op jou ken nie

Mag ek vra dat op jou reise langs  
Jy kan tyd maak vir 'n botteltjie groen  
Al met ou Sishen se spore langs  
Om by my stasie aan te doen

Want menig male sonder tal  
Het hierdie winter my kom haal  
Die spierwit van 'n spiritusperd  
Jaag al my kallers uit die kraal

Hy is nie die man op die witteperd  
Die gom om die krake te heel  
Sy soetstem streef net nou net gou  
Eens more staan sake skeel

Mag my soebatsfontein jou kompas merk  
Hot en haar tog hier kom rus  
Die lafenis van die botteltjie groen  
My nadors hier kom sus

Want jou spore lê tog wêreldwyd  
Swellendam, Moskou en Parys  
My stoeltjie stoot die sandgrond in  
En die riempiemerke wys

Vertel my dan ou langpad vrind  
Waar het jy jou rus gaan soek  
En kon jy daeraad iewers vind  
Of volg jy ook maar 'n Boek

Jou spore plant die wêreld rond  
En myne om die pot  
Jou hande sag maar woorde sterk  
Ek saag planke vir kis of kot

Haal uit ou maat die botteltjie groen  
Wat my wonde se wonde verdoof  
Dan sluk ons saam-saam stadig weg  
Al die krankheid van my hoof

Ou swerwer wat die langpad ken  
Wat die drumpel nooit kon vind nie  
Jou kroon geklee met nuwemaan  
Met geen winter op jou ken nie